

Stad da records per chamonas dal CAS

Segund meglier resultat en l'istorgia da 150 onns da las chamonas dal Club alpin svizzer

■ (fmr/sr) Cun totalmain passa 355 000 pernottaziuns scriva l'onn da las chamonas dal Club alpin svizzer (CAS) istorgia. Igl è il meglier resultat dals ultims diesch onns ed il segund meglier in summa en l'istorgia da 150 onns da las chamonas dal CAS. Sco ch'il CAS scriva en ina communicaziun a las medias haja la stad schizunt purtà in absolut record per las 153 chamonas dal CAS. Cun quai è il record dal 2009 vegnì manchentà per sulet 3800 pernottaziuns. In surpli extraordinari en cumparegliaziun cun l'onn avant han las chamonas en la Svizra centrala (+11,7%), quellas en il Tessin (+11,4%) ed en las Alps dal Vallais (+5,7%) pudì nudar. Era las chamonas en il Grischun han pudì nudar in lev augment dad 1,4% fertant che las chamonas en las Alps bernaisas (-2,1%) ed en las Alps da Glaruna e Son Gagl (-6,1%) n'han betg pudì cuntanscher dal tut las cefras dal 2018. Per la prima giada è la Lämmerenhütte en la Part sura bernaisa a la testa da las chamonas las pli visitadas. Passa 7800 pernottaziuns èn vegnidas nudadas là.

Nov record da stad

Contribù il resultat fitg allegraivel ha danovamain l'aura ch'è per gronda part stada bella cun dis fitg chauds e quai fin lunsch viaden en l'atun. Quater tschintgavels da las pernottaziuns èn vegnids registrad dal matg fin l'october e las bunamain 282 400 pernottaziuns (+1,4%) muntan in absolut record en l'istorgia da las chamonas dal CAS. Fitg bain frequentadas durant la stad passada èn stadas las chamonas en la Svizra centrala (+9,2%), en il Vallais (+7%) ed en il Tessin (+4,6%). Cun damain pernottaziuns en cumparegliaziun cun la stad dal 2018



La chamona dal Terri ha pudì nudar 5400 pernottaziuns (6100 entir onn) durant la stad 2019 e quai è il segund meglier resultat da las chamonas en Svizra.

MAD

han stuì sa cuntentar las chamonas en las Alps bernaisas (-4,1%), en las Alps dal Grischun (-4,3%) ed en las Alps da Glaruna e Son Gagl (-8,1%). Anc avant diesch quindesch onns nudavan oravant tut las chamonas alpinas ed aupalpinas la gronda part da las pernottaziuns durant la stad. Oz èn quai oravant tut las chamonas situadas sper rutas da viandar en muntogna popularas u chamonas las qualas èn sezzas daventads bain frequentadas destinaziuns d'excursiuns. La chamona Blüemlisalp en la Part sura bernaisa è cun prest 6000 pernottaziuns la chamona la pli bain frequentada durant la stad. Er finanziaimain è quai stà in fitg bun onn per las chamonas e las secziuns

dal CAS. Ils passa 355 000 ospes ch'han durmì en las chamonas e plis tschientsmillis ospes dal di han sa laschà custar l'aventura en las chamonas radund 32,5 milliuns francs.

Chamona dal Terri sin il segund plaz

Gist suenter la Blüemlisalp ha la chamona dal Terri en il Grischun pudì nudar las secund bleras pernottaziuns durant la stad. Numnadamain 5400. La Cabane de Moiry en il Vallais ha nudà 5290 pernottaziuns durant la stad, la Almagellerhütte en il Vallais 4800 e sin il tschintgavel plaz è puspè ina chamona en il Grischun, numnadamain la Carschinahütte cun 4790 pernottaziuns. Toni

Trummer, il guardiachamona da la chamona dal Terri, è fitg cuntent cun il resultat. Sco ch'el ha declerà a la FMR saja la fatschenta fitg dependenta da l'aura. Ch'els hajan pudì nudar il segund meglier resultat da la sesiun da stad da las chamonas en Svizra ed il meglier da las chamonas en Grischun saja fitg legraivel. Er sche la chamona dal Terri saja serrada sur l'enviern saja quella vis sur l'entir onn ora cun prest 6100 pernottaziuns sin il tschintgavel rang e quai gia per la terza giada. «Il boom da viandar sentin nus era fitg bain en las chamonas dal Grischun», ha declerà Trummer che lavura durant l'enviern en sia professiun sco guid da muntogna.